

ՉԱՐԷՆ ՊԱՇՏՊԱՆՈՒԵԼՈՒ ԸՆԴՀԱՆՐԱԿԱՆ ԱՂՕԹՔ

Հգօ՛ր Թագաւոր, Քրիստոս, մեր Աստուածը, ապաւեն՝ քեզի ծարաւ եղողներուն եւ փրկիչ՝ նեղութեան մէջ եղեղներուն: Դուն, որ անօրէններուն կողմէ չարչարուեցար մեզի համար, ցո՛յց տուր քու զօրութիւնդ եւ եկուր փրկէ՛ զիս, որ քու արիւնովդ գնեցիր: Թոյլ մի՛ տար որ Սատանան գերէ զիս, քու փրկածդ. մի՛ թողուր որ Չարը իրեն բնակարան դարձնէ զիս, քու սուրբ անունովդ կնքուած տաճարս. մի՛ ձգեր որ Թշնամին կոխկոտէ ու ծաղրէ զիս, քու Մարմնիդ մէկ անդամը. այլ՝ քու արարչական սիրովդ գթա՛ ինծի, քու արարածիդ:

Տէ՛ր, ողորմէ՛ մեզի, որ քու խաչդ դարձուցինք մեր միակ պարծանքը. թող քու խաչդ պահէ՛ մեզ տեսանելի եւ անտեսանելի Թշնամիէն:

Տէ՛ր, ողորմէ՛ մեզի, որ քեզ՝ Աստուածդ ծնող ամենասուրբ Կոյսին ապաւինեցանք. անոր աղօթքներով փրկէ՛ մեզ չարէն, որպէսզի առանց փորձանքներու կնքենք մեր պանդուխտ կեանքերը:

Քու տասներկու սուրբ առաքեալներուդ եւ անոնց աշակերտած հայրապետներուն սիրոյն՝ ողորմէ՛ մեզի:

Սուրբ Հռիփսիմեան եւ Գայիանեան կոյսերուն սիրոյն, ո՛վ Աստուած, ողորմէ՛ ինծի՝ մեղքերու մէջ կորսուածիս:

Սուրբ Գրիգորի եւ անոր լուսաւոր զաւակներուն սիրոյն, որոնց ձեռքով ճանչցանք քեզ՝ մեր Փրկիչը, եւ որուն ձեռքով Հայաստան աշխարհէն հալածեցիր դէներու բազմութիւնը, այժմ եւս շուտով հալածէ՛ Սատանան մեզմէ:

Սուրբ Վարդանանց եւ Ատոմեանց զօրավարներուն եւ անոնց ընկերացող սուրբ քահանաներուն սիրոյն, որոնք Չարին դէմ պատերազմեցան եւ անոր պատերազմը խափանելով Հայաստան աշխարհի սուրբ եկեղեցիները կործանումէ փրկեցին, հիմա՛ եւս, Տէ՛ր, խափանէ՛ Սատանան իր չար գործակիցներով միասին:

Սուրբ Ճգնաւորներուն, վանական հայրերուն եւ անոնց աշակերտած այրերուն ու կիներուն բարեխօսութեամբ՝ ողորմէ՛ ինծի, Տէ՛ր, որովհետեւ անոնք քեզմէ՛ շնորհք ստացան եւ քու անունովդ յաղթեցին Բանսարկուիին բոլոր հրնարքներուն: Հիմա՛ եւս, Տէ՛ր իմ, քու յաղթող զօրութեամբդ յաղթահարէ՛ Հակառակամարտը, եւ մեզի յաղթանակ տուր անոր ընդդիմութեան դէմ:

Մեր բոլոր սուրբ հայրապետներուն եւ առաջնորդներուն բարեխօսութեամբ՝ որոնց իշխանութիւն տուիր ոտքի տակ առնելու օձերն ու կարիճները եւ Թշնամիի ամբողջ զօրութիւնը, շնորհէ՛ որ հիմա մենք եւս անոնց բարեխօսութեամբ ոտքի տակ առնենք կամակոր Վիշապին գլուխը եւ լռեցնենք ու կապենք բոլոր տեսակի հերձուածողներու բերանները:

Կիներու ծնունդներուն մէջ մեծագոյնին՝ սուրբ Յովհաննէսի, եւ նախավկայ սուրբ Ստեփանոսի բարեխօսութեամբ՝ մաքրէ՛ մեզ հոգեկան ու մարմնական ամէն պղծութենէ, եւ արժանի ըրէ՛ որ ճշմարտապէս, հոգիով եւ ճշմարտութեամբ քեզի երկրպագողներուն հետ միասին երկրպագենք քեզի ու փառաւորենք ամենասուրբ Երրորդութիւնը. այժմ եւ միշտ եւ յաւիտեանս յաւիտենից: Ամէն: